

摛藻堂四庫全書薈要

史部

欽定四庫全書  
文獻通考卷九千六百二十八

史部

物異考十二

鄱陽馬端臨貴與著

物異考十二

恒風

春秋僖公十六年正月六鶴退蜚過宋都

師古曰鶴音五狄反

左

氏傳曰風也劉歆以為風發於他所至宋而高鶴高蜚而逢之則退經以見者為文故記退蜚傳以實應著言

風常風之罰也象宋襄公區霑自用不容臣下逆司馬

子魚之諫而與彊楚爭盟

師古曰子魚公子目夷也桓公之子而為司馬爭盟謂為

鹿上之盟以求諸侯於楚子魚後六年為楚所執

師古曰小國爭盟禍也公不聽之後六年為楚所執

二十一年楚執宋公以伐宋距六鶴退飛凡六年

應六鶴之數云京房易傳曰

潛龍勿用

師古曰乾初九爻辭

衆逆同志至德迺潛厥異風其風

也行不解物不長

師古曰不解物謂物逢之而不解散也不長所起者近也

雨小而

傷政悖德隱茲謂亂厥風先風不雨大風暴起發屋折

木守義不進茲謂耄厥風雲俱起折五穀莖臣易上政

茲謂不順厥風大焱發屋

師古曰焱疾風也音必遙反

賦斂不理茲

謂禍厥風絕經緯

如淳曰有所破壞絕匹帛之屬也晉灼曰南北為經東西為緯絲因風暴

亂不止即溫溫即蟲侯專封茲謂不統厥風疾而樹理也

不搖穀不成辟不思道利茲謂無澤

師古曰道讀導不思導示於下而安

利厥風不搖木旱無雲傷禾公常於利茲謂亂

師古曰公上爵

也常於利謂厥風微而溫生蟲蝗害五穀棄正作淫茲

謂惑厥風溫螟蟲起害有益人之物侯不朝茲謂叛厥風無恒地變赤而殺人

漢文帝二年六月淮南王都壽春大風毀民室殺人時淮南王破南越後遂謀逆帝赦之還蜀道死五年吳暴風雨壞城官府民室時吳王濞謀為逆亂後卒誅滅五年十月楚王都彭城大風從東南來毀市門殺人時王戊初嗣位後坐淫削國與吳王謀反誅武帝元光五年秋七月大風拔木征和二年夏四月大風發屋折木昭帝元鳳元年燕王都薊大風雨拔宮中樹七圍以上十六株壞城樓後燕王旦謀反發覺誅成

帝建始元年十二月大風拔甘泉畤中大木十圍以上

王莽天鳳元年七月大風拔木飛北闕直城屋瓦

地皇元年七月大風毀王路堂

後漢光武於更始元年六月中破王尋王邑兵于昆陽

大雷風屋瓦皆飛 和帝永元五年五月戊寅南陽大

風拔樹木 安帝永初元年大風拔樹是時鄧太后攝

政以清河王子年少號精耳故立之是為安帝不立皇

太子勝以為安帝賢必當德鄧氏也後安帝親讒廢免

鄧氏令郡縣迫切死者八九人家至破壞此為瞽霧也  
是後西羌亦大亂涼州十有餘年 二年六月京師及  
郡國四十大風拔木 三年五月癸酉京都大風拔南  
郊道梓樹九十六株 七年八月丙寅京都大風拔樹  
元初二年二月癸亥京都大風拔樹 六年夏四月  
沛國渤海大風拔樹三萬餘株 延光二年三月丙申  
河南潁川大風拔樹六月壬午郡國一大風拔樹是  
時安帝親讞曲直不分 三年京都及郡國三十六大

風拔樹 靈帝建寧二年四月癸巳京都大風雨雹拔

郊道樹十一圍已上百餘株其後晨迎氣東郊道於雒

水西橋逢暴風雨鹵薄車或發蓋百官霑濡還不至郊

使有司行禮迎氣西郊亦壹如此 中平五年六月丙

寅大風拔樹 獻帝初平四年六月右扶風大風發屋

拔木

魏齊王正始九年十一月大風數十日發屋折樹十二  
月戊午晦尤甚動太極東閣 嘉平元年正月壬辰朔

西北大風發屋折樹木昏塵蔽天按管輅說此為時刑  
大風執政之憂也是時曹爽區霧自專驕僭過度此思  
心不睿恒風之罰也後踰旬而爽誅滅

吳孫權太元元年八月朔大風江海涌溢平地水深八  
尺拔南陵樹二千株石碑蹉動吳城兩門飛落按華覈  
對役繁賦重區霧不容之罰也明年權薨 孫亮建興

元年十二月甲申大風震電是歲魏遣大衆三道來攻  
諸葛恪破其東興軍二軍亦退明年恪又攻新城喪衆

大半還伏誅

孫休永安元年十一月甲午風四轉五

復蒙霧連日是時孫綸一門五侯權逼吳王風霧之災

與漢五侯丁傅同應也十二月丁卯夜有大風發木揚

沙明日紂誅

晉武帝泰始五年五月辛卯朔廣平大風折木 咸寧

元年五月下邳廣陵大風壞千餘家折樹木其月甲申  
廣陵司吾下邳大風折木 二年八月河間大風折木

太康二年五月濟南暴風折木傷麥六月高平大風

折木發壞邱閣四十四區七月上黨又大風傷秋稼

八年六月郡國八大風 九年正月京都風雹發屋拔

樹後二年宮車晏駕 惠帝元康四年六月大風雨拔

樹 五年四月庚寅夜暴風城東渠波浪殺人七月下

邳大風壞廬舍九月鴈門新興太原上黨災風傷稼明

年氐羌反叛大兵西討 九年六月颶風吹賈謐朝服

飛數百丈明年謐誅十一月甲子朔京都連大風發屋

折木十二月愍懷太子廢幽於許昌 永康元年二月

大風拔木三月愍懷被害己卯喪柩發許昌還洛是日  
又大風雷電幃蓋飛裂四月張華第舍颶風起折木飛  
縕折軸六七是月華遇害十一月戊午朔大風從西北  
來折木飛沙石六日止明年正月趙王倫篡位 永寧  
元年八月郡國三大風 永興元年正月乙丑西北大  
風 趙王倫建始元年正月癸酉趙王倫祠太廟災風  
暴起塵四合其年四月倫伏辜 元帝永昌元年七月  
丙寅大風拔木屋瓦皆飛八月暴風壞屋拔御道柳樹

百餘株其風縱橫無常若風自八方來者是時王敦專  
權害尚書令刁協僕射周顥等故風縱橫若非一處也  
此臣易上政諸侯不朝之罰也十一月宮車晏駕 成  
帝咸康四年三月壬辰成都大風發屋折木四月李壽  
襲殺李期自立 康帝建元元年七月庚寅晉陵吳郡  
災風 穆帝升平元年八月丁未冊立皇后何氏是日  
疾風後桓玄篡位乃降后為零陵縣君不睿之罰也  
五年正月戊午朔大風 海西公太和六年二月大風

迅急是年被廢 孝武帝寧康元年三月京都大風火  
大起是時桓溫入朝志在陵上帝又幼小人懷憂恐斯  
不睿之徵也 三年三月戊申朔暴風迅起從丑上來  
湏臾逆轉從子上來飛沙揚礫 太元二年二月乙丑  
朔暴風折木閏三月甲子朔暴風疾雨俱至發屋折木  
三年六月長安大風拔苻堅宮中樹其後堅再南伐  
遂有淝水之敗身戮國亡 四年八月丁未暴風揚沙  
石 十二年正月壬午夜暴風七月甲辰大風折木

十三年十二月己未大風晝晦其後帝崩而諸侯違命  
權奪於元顯禍成於桓玄是其應也 十七年六月乙  
未大風折木 安帝元興二年二月夜大風雨大航門  
屋瓦飛落明年桓玄篡位由此門入 三年正月桓玄  
出遊大航南風飄其輶輓上匹計反下五計反蓋經三月而玄敗  
歸江陵五月江陵又大風折木是月桓玄敗於崢嶸洲  
身亦屠裂十一月丁酉大風江陵人多死者 義熙四年  
十一月辛卯朔西北方疾風起 五年閏十一月丁

亥大風發屋明年盧循至蔡洲 六年五月壬申大風  
拔北郊樹樹蓋幾百年也并吹琅邪揚州二射堂俱倒  
壞是日盧循大艦漂沒甲戌又風發屋折木是歲冬王  
師南討 九年正月大風白馬寺浮圖刹初轄  
反柱折壞

十年四月己丑朔大風拔木六月辛亥又大風拔木  
七月淮北又大風壞屋舍皆為明年西討司馬休之應  
也

宋文帝元嘉二十九年三月壬午大風拔木

齊武帝永明四年二月丙寅大風吳興偏甚樹葉皆赤  
八年六月乙酉都下大風發屋

梁武帝天監六年八月戊戌大風折木京房易飛候曰  
角日疾風天下昏不出三月中兵必起是歲魏軍入鍾  
離元帝承聖三年十一月癸未帝閱武於南城北風  
大急普天昏闇洪範五行傳曰人君晉亂之應時帝既  
平侯景公卿咸勸帝反丹陽帝不從又多猜忌有晉亂  
之行故天變應之以風是歲為西魏滅

陳文帝天嘉六年七月癸未大風起西南吹倒靈臺候  
樓洪範五行傳以為大臣專恣之咎時太子冲幼安成  
王頃專政帝不時抑損明年崩皇太子嗣位頃遂廢之  
宣帝太建十二年六月壬戌大風吹壞臯門中閨九  
月夜又風發屋拔樹始興王叔陵專恣之應後主至  
德中大風吹倒朱雀門禎明三年六月丁巳大風自  
西北激濤水入石頭淮是時後主任司馬申誅戮忠諫  
沈客卿施文慶專行邪僻江總孔範等崇長淫縱杜塞

聰明督亂之咎

北齊武成河清二年大風三旬乃止時帝委政佞臣和士開專恣日甚後主天統三年五月大風晝晦發屋拔木明年帝崩七年三月大風起西北發屋拔木五日乃止時高阿那瓌駱提婆等專恣之應

隋文帝開皇二十年十一月京師大風發屋拔木秦隴壓死者千餘仁壽二年西河有胡人乘驃在道忽為迴風所飄并一車上千餘尺乃墜皆碎焉京房易傳曰

衆逆同志至德乃潛厥異風後二載漢王諒在并州潛謀逆亂車及驃騎之象也升空而墜顛殞之應也

唐高宗武德二年十二月壬子大風易巽為風重巽以申命其及物也象人君誥命其鼓動於天地間有時飛沙揚塵怒也發屋拔木者怒甚也其占大臣專恣而氣盛衆逆同志君行蒙暗施於事則皆傷害故常風又飄風入宮闕一日再三若風聲如雷觸地而起為兵將興太宗貞觀十四年六月乙酉大風拔木高宗咸亨

四年八月己酉大風落太廟鷁尾 永隆二年七月雍

州大風害稼 弘道元年十二月壬午晦宋州大風拔

木 中宗嗣聖元年四月丁巳寧州大風拔木 武后

垂拱四年十月辛亥大風拔木 永昌二年五月丁亥

大風拔木 中宗神龍元年三月乙酉睦州大風拔木

崔元暉封博陵郡王也大風折其輶蓋 二年六月乙

亥滑州大風拔木 景龍元年七月郴州大風發屋拔

木八月宋州大風拔木壞屋舍 二年十月辛亥滑州

暴風發屋 三年三月辛未曹州大風拔木 玄宗開  
元二年六月京師大風發屋大木拔者十七八 四年  
六月辛未京師陝華大風拔木 九年七月丙辰揚州  
潤州暴風雨發屋拔木 十四年六月戊午大風拔木  
發屋端門鵝尾盡落端門號令所從出也 十九年六  
月乙酉大風拔木 二十二年五月戊子大風拔木  
天寶十一載五月甲子東京大風拔木 十三載三月  
辛酉大風拔木 代宗永泰元年三月辛亥大風拔木

大歷七年五月乙酉大風拔木 十年五月甲寅大  
風拔木 德宗貞元元年七月庚子大風拔木 六年  
四月甲申大風雨 八年五月己未暴風發太廟屋瓦  
毀門闕官署屋舍不可勝紀 十年六月辛未大風拔  
木 十四年八月癸未廣州大風壞屋覆舟 憲宗元  
和元年六月丙申大風拔木 三年四月壬申大風毀  
含元殿欄檻二十七間占為兵起 四年十月壬午天  
有氣如煙臭如燔皮日昧大風而止 五年三月丙子

大風毀崇陵上宮衙殿鷁尾及神門戟竿六壞行垣四十間  
八年六月庚寅京師大風雨毀屋飄瓦人多壓死者丙申富平大風拔棗木千餘株  
十二年春青州一夕暴風自西北天地晦冥空中有若旌旗狀屋瓦上如躁蹠聲有日者占之曰不及五年此地當大殺戮  
穆宗長慶二年正月己酉大風霾十月夏州大風飛沙為堆高及城堞  
三年正月丁巳朔大風昏霾終日四年六月庚寅大風毀延喜門及景風門  
文宗太和

八年六月癸未暴風壞長安縣署及經行寺塔 九年

四月辛丑大風拔木萬株墮含元殿四鷗尾拔殿庭樹

三壞金吾仗舍發城門樓觀內外三十餘所光化門西

城十數雉壞 開成三年正月戊辰大風拔木 五年

四月甲子大風拔木五月壬寅亦如之七月戊寅亦如

之 武宗會昌元年三月黔南大風飄瓦 懿宗咸通

六年正月絳州大風拔木有十圍者十一月己卯晦潼

關夜中大風山如吼雷河噴石鳴羣鳥亂飛重關傾側

十二月大風拔木 僖宗乾符五年五月丁酉大風拔

木 廣明元年四月甲申京師及東都汝州雨雹大風

拔木 四年六月乙巳太原大風雨拔木千株害稼百

里 昭宗光化三年七月乙丑洛州大風發屋拔木

天復二年昇州大風發屋飛大木

後漢隱帝乾祐三年閏五月癸巳京師西北風暴雨至  
戴婁門外壞營舍瓦木吹鄭門門扉起十餘步落拔大

樹數十震死者六七人平地水深尺餘其年十一月隱

帝遇害

宋太祖乾德二年五月揚州暴風壞軍營舍僅百區

三年六月揚州暴風壞軍營及城上敵棚  
開寶二年

三月車駕駐太原城下大風一夕而止  
八年十月廣

州颶風起一晝夜雨水二丈餘海為之漲飄失舟  
九

年四月宋州大風壞甲仗庫城樓軍營民舍凡四千五

百九十六區  
太宗太平興國二年六月曹州大風壞

濟陰縣廨及軍營  
四年八月泗州大風浮梁竹竿鐵

索斷華表石柱折 六年九月高州大風壞廨宇民舍  
五百區 七年八月瓊州颶風壞城門州署民舍殆盡  
八年九月太平軍颶風拔木壞廨宇民舍千八十七  
區十月雷州颶風壞廩庫民舍七百區 九年八月白  
州颶風壞州廨民舍 端拱二年京師暴風起東北塵  
沙曠日人不相辨 淳化二年五月通利軍大風害稼  
三年六月丁丑黑風自西北起天地晦暝雷震有頃  
乃止先是都下大熱疫死者衆及此風至疾疫遂止

至道二年八月潮州颶風壞州廨營寨漂刀魚舟 真  
宗咸平元年八月涪州大風壞城舍 四年八月丙子  
京師暴風 景德二年六月甲午大風吹沙折木八月  
福州海上有颶風壞屋舍 三年七月丙寅京師大風  
四年三月甲寅夕京師大風黃塵蔽日自大名府歷  
京畿害桑稼唐州尤甚 大中祥符二年四月乙未大  
風起京師西北連日不止九月無為軍城北暴風雨晝  
晦不可辨拔木壞城門營壘民舍壓死千餘人遣內侍

張景宣馳驛卹視壞屋者無出來年夏租壓死者家賜米一斛無主者官瘞之 五年八月京師大風 七年二月戊辰京師大風揚沙礫是日百官習儀恭謝壇有隨仆者 六年六月辛亥京師大風起已位吹沙揚塵 天禧二年正月永州大風發屋拔木數日止 三年五月徐州利國監大風起西南壞廬舍二百餘區壓死十二人 四年四月丁亥大風起西北飛沙折木晝晦數刻止五月乙卯大風起西北有聲折木吹黃塵蔽天

按占並主陰謀姦邪是秋內侍周懷政坐妖亂伏誅

仁宗天聖六年二月庚辰大風晝暝 九年十二月辛酉

大風三日 景祐元年九月甲寅夜漏上風自丑起

有聲攏木鳴條 二年六月戊寅平明風自未來占者以為百穀豐衍之候 康定元年大風晝暝經刻乃復

皇祐四年七月丁巳大風拔木 神宗熙寧四年二

月辛巳京東自濮州至河北旁邊大風異常百姓驚恐

四月癸亥京師大風霾 六年四月北京館陶縣黑風

九年十一月潮州海陽潮陽二縣颶風海潮害民田稼  
十年六月恩州武城縣大風壞縣解知縣李愈妻  
主簿寇宗奭妻之母壓死七月溫州大風雨漂城樓官  
舍元豐四年六月邕州颶風壞城樓官私廬舍七月  
甲午夜泰州海風作繼以大雨浸州城壞公私廬舍數  
半間又通州靜海縣大風雨毀官私廬舍二千七百六  
十三楹潤州丹陽縣大風雨溺居民毀廬舍丹徒縣大  
風潮飄蕩沿江廬舍損田稼五年八月朱崖軍颶風

毀廬舍 哲宗元祐八年二月末京師風霾大寒是歲

福建兩浙海風駕潮害民田 紹聖元年秋蘇湖秀等

州海風害民田 欽宗靖康元年正月望夜大風起西

北有聲吹沙走石盡明日乃止二月戊申大風起東北

揚塵翳空三月己巳夜五更大風乍慢乍急聲如呻怒

十一月丁亥大風發屋折木閨十一月甲寅大風起北

方雪繼作積數尺連夜不停 二年正月己亥天氣昏

曠狂風迅發竟日夜西北陰雲中如有火光二丈餘闊

數尺時時見庚戌大風雨二月乙酉大風折木晚尤甚  
三月丁酉風霾已亥大風四月庚申朔大風吹石折木  
辛酉北風益甚苦寒 高宗建炎元年二月乙酉大風  
拔木 紹興二十八年七月壬戌平江府大風雨駕潮  
漂溺數百里壞田廬 三十二年七月戊申大風拔木  
溫州大風壞屋覆舟 孝宗隆興元年浙東西郡國風  
水傷稼 二年八月大風雨飄蕩田廬 乾道二年八  
月丁亥溫州大風雨駕海潮殺人覆舟壞廬舍 五年

十月台州大風水壞田廬 八年六月丙辰惠州颶風壞海艦三十餘時樞密院調廣東經略司水軍四艦覆其三死者百三十餘人 淳熙三年六月大風連日

四年九月明州大風駕潮壞定海鄞縣海岸七千六百餘丈及田廬軍壘六月乙巳夜福州福清縣興化軍大風雨壞官舍民居倉庫及海口鎮人多死者 六年十一月鄂州大風覆舟溺人甚衆 七年二月江陵府大風焚溺岸舟死者尤衆 十年八月辛酉雷州颶風大

作駕海潮飄溢殺人林木田禾皆折 光宗紹熙二年

二月癸酉溫州瑞安縣大風仆屋拔木殺人 四年七

月興化軍海風害稼 五年七月乙亥行都大風拔木

壞舟甚衆紹興府秀州大風駕海潮害稼秋明州颶風

駕海潮害稼十月甲戌行都大風拔木 寧宗慶元二

年六月壬申台州暴雨駕海潮壞田屋 六年夏常

風當夏而寒 嘉定二年七月壬辰台州大風雨駕海

潮壞屋殺人 三年八月癸酉大風連日大木皆拔折

禾穗墮果實上露禱至於丙子乃息後御史朝陵於紹  
興府歸奏風壞陵殿宮牆六十餘所折陵木二千餘株  
六年十二月餘姚縣風潮壞海堤亘八鄉 七年正  
月庚辰江州燈夕黑雲暴風暮作郡治游人相踐死於  
門者二十餘人十一月二日甲寅大風 十六年秋大  
風拔木害稼 十七年秋福州颶風大作壞田損稼冬  
鄂州暴風壞戰艦二百餘壽昌軍壞戰艦六十餘江州  
興國軍亦如之

恒陰

漢昭帝元平元年四月崩亡嗣立昌邑王賀賀即位天  
陰晝夜不見日月賀欲出光祿大夫夏侯勝當車諫曰  
天久陰而不雨臣下有謀上者陛下欲何之賀怒縛勝  
以屬吏師古曰屬委也音之欲反吏白大將軍霍光光時與車騎將  
軍張安世謀欲廢賀光讓安世以為泄語安世實不泄  
召問勝勝上洪範五行傳曰皇之不極厥罰常陰時則  
有下人伐上不敢察察言臣瓊曰不敢察察明言之故云臣下有謀

光安世讀之大驚以此益重經術士後數日卒共廢賀此常陰之明效也京房易傳曰有蜺蒙霧霧上下合也

蒙如塵雲蜺日旁氣也其占曰后妃有專蜺再重赤而

專至衝旱

孟康曰專員也若五月再重赤而員至十一月旱也

妻不壹順黑蜺四

背又白蜺雙出日中妻以貴高夫茲謂擅陽蜺四方日

光不揚解而溫

服虔曰蒙氣解而溫

內取茲謂禽

服虔曰人君淫於骨肉也臣

瓊曰人君取於國中也師古曰取如禮記聚塵之聚瓊說非

蜺如禽在日旁以尊降

妃茲謂薄嗣蜺直而塞六辰廼除夜星見而赤

韋昭曰六辰謂

從卯女不變始茲謂乘夫

孟康曰始高貴於夫終行此不變也

蜺白在日

至申

女不變始茲謂乘夫

夫終行此不變也

側黑蜺果之氣正直

師古曰果謂干之也

妻不順正茲謂擅陽蜺

中窺貫而外專夫妻不嚴茲謂媒

韋昭曰媒言媒慢也師古曰音先列反

蜺與日會婦人擅國茲謂頃

師古曰頃讀曰傾

蜺白貫日中赤

蜺四背

服虔曰適不答茲謂不次答也臣瓊曰夫不接

蜺背日妻為不答師古曰適讀曰嫡答報也言妻有承順之心不見報答也一曰答對也言不以恩意接對之

蜺直在左蜺交在右取於不專茲謂危嗣蜺抱日兩未及

君淫外茲謂亡蜺氣左日交於外取不達茲謂不知蜺

白奪明而大溫溫而雨

師古曰取  
讀曰聚

尊卑不別茲謂媒蜺

三出三已三辰除

韋昭曰若從寅至辰  
也  
蜺旦見西晏則雨

除則日出且雨

臣私祿及親茲謂罔辟

韋昭曰辟君也  
音壁其下並同

厥異蒙其

蒙先大溫已蒙起日不見行善不請於上茲謂作福蒙

一日五起五解辟不下謀臣辟異道茲謂不見上蒙下

霧風三變而俱解立嗣子疑茲謂動欲蒙赤日不明德

不序茲謂不聰蒙日不明溫而民病德不試空言祿

師古

不序茲謂不聰蒙日不明溫而民病德不試空言祿

曰試  
也

茲謂主窳臣夭孟康曰謂君情窳用人不以

用也

而白君樂逸人茲謂放蒙日青黑雲夾日左右前後行  
過日公不任職茲謂怙祿蒙三日又大風五日蒙不解  
利邪以食茲謂閉上蒙大起白雲如山行蔽日公懼不  
言道茲謂閉下蒙大起日不見若雨不雨至十二日解  
而有大雲蔽日祿生於下茲謂誣君蒙微而小雨已乃  
大雨下相攘善茲謂盜明蒙黃濁下陳功求於上茲謂  
不知蒙微而赤風鳴條解復蒙下專刑茲謂分威蒙而  
日不得明大臣厭小臣茲謂蔽蒙微日不明若解不解

大風發赤雲起而蔽日衆不惡惡茲謂閉蒙尊卦用事

孟康曰尊卦乾坤也臣瓊曰京房謂方三日而起日不  
伯卦震兌坎離也師古曰孟說是也

見漏言亡喜茲謂下厝用

師古曰厝音千各反

蒙微日無光有雨

雲雨不降廢忠惑佞茲謂亡蒙天先清而暴蒙微而日

不明有逸民茲謂不明蒙濁奪日光公不任職茲謂不

訕蒙白三辰止則日青青而寒寒必雨忠臣進善君不

試茲謂遏師古曰試用也蒙先小雨雨已蒙起微而日不明惑

衆在位茲謂覆國蒙微而日不明一溫一寒風揚塵知

佞厚之茲謂庫蒙甚而溫君臣故弼茲謂悖

師古曰弼猶相戾也

憤惑

厥災風雨霧風拔木亂五穀已而大霧庶正蔽惡

茲謂生孽災厥異霧此皆陰雲之類云

後漢順帝陽嘉二年郎顗上書云正月以來陰閭連日久陰不雨亂氣也得賢不用猶久陰不雨也

吳孫亮太平三年自八月沉陰不雨四十餘日是時將誅孫綽謀泄九月戊午綽以兵圍宮廢帝為會稽王此常陰之罰也孫皓寶鼎元年十二月太史奏久陰不

雨將有陰謀孫皓驚懼時陸凱等謀因其謁廟廢之及出留平領兵前驅凱先語平平不許是以不果皓既肆虐羣下多懷異圖終至降亡

隋文帝開皇二十年十月久陰不雨劉向曰王者失中臣下蔽君明則雲陰時獨孤后與楊素譖太子勇廢之唐武后長壽元年九月戊戌黃霧四塞霧者百邪之氣為陰冒陽本於地而應於天也黃為土土為中宮長安四年自九月霖雨陰晦至於神龍元年正月 中宗

神龍二年三月乙巳黃霧四塞 景龍二年八月甲戌  
黃霧昏濁不雨 三年正月丁卯黃霧四塞十一月甲  
寅日入後昏霧四塞經二日乃止占曰霧連日不解其  
國昏亂 玄宗開元五年正月戊辰昏霧四塞 天寶  
十四載冬三月常霧昏暗十步外不見人是謂晝昏占  
曰有破國 肅宗至德二載四月賊將武令珣圍南陽  
白霧四塞 上元元年閏四月大霧占曰兵起 德宗  
貞元十年三月乙亥黃霧四塞日無光 二十年秋

連月陰霪 憲宗元和十五年正月庚辰至於丙申晝常陰晦微雨雪夜則晴霽占曰晝霧夜晴臣志得申懿宗咸通九年十一月龐勛圍徐州甲辰大霧昏塞至於丙午十四年七月靈州陰晦僖宗乾符六年秋多雲霧晦冥旦及禺中乃解光啓元年秋河東大雲霧明年夏晝陰積六十日二年十一月淮南陰晦雨雪至明年二月不解昭宗景福二年夏連陰四十餘日霧光化四年冬昭宗在東內武德門煙霧四塞

門外日色皎然

宋高宗建炎三年六月久陰上謂輔臣曰占為陰盛下有陰謀語在常雨 紹興三年自正月陰晦陽光不舒者四十餘日 八年三月乙卯晝蒙京房易傳曰霧上下合也蒙如塵雲四月積雨方止氣霧四塞晝日無光近常陰也 孝宗隆興二年六月沈陰不解者月餘乾道二年十一月天久晦陰 五年正月甲申晝蒙六年五月連陰六月日青無光 淳熙六年十一月乙

丑晝蒙 十三年正月丁亥亦如之 寧宗慶元六年

十二月辛卯 嘉定三年正月丙午 十年正月乙未

十三年三月壬辰皆晝蒙

夜妖

春秋僖公十五年九月己卯晦震夷伯之廟

師古曰夷  
伯司空無

駭之後本魯公  
族也號展氏

劉向以為晦暝也震雷也夷伯世大夫

正晝雷其廟獨冥

師古曰冥暗也

天戒若曰勿使大夫世官將

專事暝晦明年公子季友卒果世官

師古曰謂季友之孫行父仍執政專

國自此以政在季氏至成公十六年正月甲午晦正晝  
後常為卿制君也成公不寤其冬季氏殺公子偃  
皆暝陰為陽臣制君也成公不寤其冬季氏殺公子偃  
師古曰為季文子所殺也已解於上  
李氏萌於僖公生也言其始有威權  
大於成公此其應也董仲舒以為夷伯季氏之孚也  
曰孚信也所任之臣也  
陪臣不當有廟震者雷也晦暝雷擊其廟  
明當絕去僭差之類也向又以為此皆所謂夜妖者也  
劉歆以為春秋及朔言朔及晦言晦人道所不及則天  
震之展氏有隱慝故天加誅於其祖夷伯之廟以譴告

之也 成公十六年六月甲午晦晉侯及楚子鄭伯戰于鄢陵皆月晦云

漢高祖二年東伐楚入彭城項羽以精兵擊漢軍大破之圍漢王三匝大風起揚沙石晝晦楚軍大亂漢王得與數十騎遁去

魏高貴鄉公正元二年正月戊戌景帝討毋丘儉大風晦暝行者皆頓伏近夜妖也劉向曰晝晦而暝陰為陽臣制君也 元帝景元三年十月京師大震晝晦此夜

妖也劉向春秋說云天戒若曰勿使大夫世官將令專事暝晦公室卑矣魏見此妖晉有天下之應也

晉武帝泰始三年三月丁未晝昏 懷帝永嘉四年十一月辛卯晝昏至於庚子此夜妖也後年劉曜寇洛川王師頻為賊所敗帝蒙塵於平陽 孝武帝太元十三年十二月乙未大風晦暝其後帝崩而諸侯違命干戈內侮權奪於元顯禍成於桓玄

苻堅時大風晝暝恒星皆見太史以為西南國亡明

年堅陷蜀

梁元帝承聖二年十月丁卯大風晝暝天地昏暗近夜  
妖也京房易飛候曰羽日風天下昏人大疾不然多寇  
盜三年為西魏所滅

陳後主禎明三年正月朔旦雲霧晦暝入鼻酸辛後主  
昏昧近夜妖也時北軍臨江柳莊任蠻奴並進中欵後  
主惑倭臣孔範之言而昏闇不能用以至覆亡

東魏孝靜武定四年冬大霧六日晝夜不解洪範五行

傳曰晝而晦冥若夜者陰侵陽臣將侵君之象也明年元瑾劉思逸謀殺大將軍之應

北周靜帝大象二年尉迥敗於相州坑其黨與數萬人於遊豫園其處每聞鬼夜哭聲洪範五行傳曰哭者死亡之表近夜妖也鬼而夜哭者將有死亡之應京房易飛候曰鬼夜哭國將亡明年周氏王公皆見殺周室亦亡

隋文帝仁壽中仁壽宮及長城之下數聞鬼哭尋而獻

后及帝相次而崩於仁壽宮 燔帝大業八年楊玄感作亂於東都尚書樊子蓋坑其黨與長夏門外前後數萬洎於末年數聞其處鬼哭有呻吟之聲與前占同其後王世充害越王侗於洛陽

唐文宗太和九年十一月戊辰晝晦 懿宗咸通七年

九月辛卯朔天闇僖宗乾符二年二月宣武境內黑

風雨土 昭宗天祐元年閏四月乙未朔大風雨土

後周世宗顯德六年六月辛卯辰巳間京師天地晦暝

澍雨驟降雨中有腥氣其日世宗崩

宋太宗端拱二年京師暴風起東北塵沙曠日人不相辨  
淳化三年六月丁丑黑風自西北起天地晦冥雷

震有頃乃止  真宗大中祥符二年九月無為軍城北

暴風雨晝晦不可辨拔木壞城門營壘民舍  仁宗天

聖六年二月庚辰大風晝暝  康定元年三月丙子大

風晝暝經刻乃復  嘉祐八年十一月丙午大風霾

英宗治平二年二月乙巳大風晝晦  四年正月庚辰

朔大風霾是日羣臣上尊號廷中仗衛皆不能整時帝不豫越七日崩 神宗熙寧四年四月京師大風霾

欽宗靖康二年正月己亥天氣昏曠風迅發竟日丁未霧氣四塞人對面不相視 高宗建炎元年三月丁酉汴京風霾日無光劉向曰正晝而暝陰為陽臣制君也是日張邦昌僭位 二年七月癸未風雨晝晦是日東京留守宗澤薨十一月甲子北京大霧四塞是夕城陷三年三月上發溫州航海乙丑御舟次松門海中白

霧晝晦近夜妖也。紹興八年三月甲寅晝晦日無光。  
陰霧四塞乙卯晝夜雲氣昧濁。十一年主管成都等  
路茶事馮康國言三月庚申金居長安晝晦面不相睹  
金亡之象也。孝宗乾道五年正月甲申晝霾四塞  
淳熙五年四月丁丑塵霾晝晦日無光。寧宗慶元元  
年二月己卯晝暝四方昏塞。三年二月丁卯晝晦昏  
霧四塞。嘉定十年正月乙未晝霾二月癸巳日蒙無  
光。

文獻通考卷三百六

總校官庶吉士臣張能照  
校對官修撰臣張書勲

謄錄監生臣周志禮

欽定四庫全書叢書要

史部

文獻通考卷三百八

詳校官員外郎臣潘紹觀



欽定四庫全書叢要卷九千六百二十九

史部

文獻通考卷三百七

鄧 陽 馬 端 旨 貴 與 著

異考十三

雷震



成王時秋大熟未穫天大雷電以風禾盡偃大木斯拔  
邦人大恐

秦始皇五年冬雷

漢惠帝五年冬十月雷 景帝六年十二月雷霖雨

昭帝元鳳五年十一月大雷

王莽始建國二年十二月雷

後漢光武建武七年遼東冬雷草木實 和帝元興元

年冬十一月壬午郡國四冬雷時皇子數不遂皆隱之

民間是歲宮車晏駕殤帝生百餘日立以為君帝兄平

原王有疾不立卒皆夭無嗣 殤帝延平元年九月乙

亥陳留雷有石隕地四 安帝永初六年十月丙戌郡

國六冬雷

京房占曰天冬雷地必震又曰教令擾又曰雷以十一月起黃鍾二月大聲八月闔藏此

以春夏殺無辜不湏冬刑致災蟄蟲出行不救之則冬溫風以其來年疾病其救也恤幼孤振不足議獄刑賞

謫罰災則消矣古今注曰明帝

永平七年十月丙子越雋雷

七年十月戊子郡國

三冬雷

元初元年十月癸巳郡國三冬雷三年十

月辛亥汝南樂浪冬雷

四年十月辛酉郡國五冬雷

六年十月丙子郡國五冬雷

永寧元年十月郡國

七冬雷

建光元年十月郡國七冬雷延光四年郡

國十九冬雷是時太后攝政上無所與太后既崩阿母

王聖及皇后兄閻顯兄弟更秉威權上遂不親萬機從容寬仁任臣下古今注曰順帝永和四年四月戊午雷震擊高廟世祖廟外槐樹桓

帝建和三年六月乙卯雷震憲陵寢屋先是梁太后聽

兄冀枉殺李固杜喬靈帝熹平六年冬十月東萊冬

雷 中平四年十二月晦雨水大雷電雹獻帝初平

三年五月丙申無雲而雷 四年五月癸酉無雲而雷

魏明帝景初中洛陽城東橋城西洛水浮橋桓楹同日

三處俱時震尋又震西城上候風木飛鳥時勞役大起

帝尋晏駕

吳孫權赤烏八年夏震宮門柱又擊南津大橋桓檻  
孫亮建興元年十二月朔大風震電是月又雷雨義同  
前說亮終廢

晉武帝太康六年十二月甲申朔淮南郡震電 七年  
十二月己亥毘陵雷電南沙司鹽都尉戴亮以聞 十  
年十二月癸卯廬江建安雷電大雨 惠帝永康元年  
六月癸卯震崇陽陵標西南五百步標破為七十片是

時賈后陷害鼎輔寵樹私戚與漢桓帝時震憲陵寢同  
事也后終誅滅 永興二年十月丁丑雷震 懷帝永  
嘉四年十月震電 懷帝建興元年十一月戊辰會稽  
大雨震電已夜赤氣曜於西北是夕大雨震電庚午  
大雪按劉向說雷以二月出八月入今此月震電者陽  
不閉藏也既發泄而明日便大雪皆失節之異也是時  
劉淵僭號平陽李雄稱制於蜀九州幅裂衣西京孤微為  
君失時之象也赤氣赤祥也 元帝太興元年十一月

乙卯暴雨雷電 永昌二年七月丙子朔雷震太極殿  
柱十二月會稽吳郡雷震電 成帝咸和元年十月己  
巳會稽郡大雨震 三年六月辛卯臨海大雷破郡府  
內小屋柱十枚殺人九月二日壬午立冬會稽雷電  
四年十一月吳郡會稽震電 穆帝永和七年十月壬  
午雷雨震電 升平元年十一月庚戌雷乙丑又雷  
五年十月庚午東南方雷 孝武帝太元五年六月甲  
寅雷震含章殿四柱并殺內侍二人 十年十二月雷

聲在南方 十四年七月甲寅雷震燒宣陽門西柱

安帝隆安二年九月壬辰雷雨 元興三年永安皇后  
至自巴陵將設儀導入宮天雷震人馬各一俱殪於計  
反

焉 義熙四年十一月辛卯朔西北方疾風發癸丑雷

六月甲寅雷震太廟破東鵝尾徹柱又震太子西池合

堂是時帝不親烝嘗故天震之明簡宗廟也西池是明

帝為太子時所造次故號太子池及安帝多病患無嗣

故天震之明無後也 六年正月甲寅雷又雪十二月

壬辰大雷 九年十一月甲戌雷乙亥又雷

陳宣帝大建元年七月大雨震萬安陵華表又震慧日  
寺刹瓦官寺重閣門下一女子震死京房易飛候曰雷  
雨辟靈丘陵者逆先人令為火殺人者入君用讒言殺  
正人時蔡景歷以奸邪任用又僕射陸繕以讒毀獲譴  
發病而死 十年三月震武庫時帝好兵頻年北伐內  
外虛竭將士勞弊既克淮南又進圖彭沐毛喜切諫不  
納由是吳明徹諸軍皆沒遂失淮南之地武庫者兵器

之所聚也而震之天戒若曰宜戢兵以安百姓帝不悟  
又大興軍旅其年六月又震太皇寺刹莊嚴寺露槃重  
陽閣東樓鴻臚府門太皇莊嚴二寺陳國奉佛之所重  
陽閣每所遊宴鴻臚賓客禮儀之所在而同歲震者天  
戒若曰國威已喪不務修德後必有恃佛道耽宴樂棄  
禮儀而亡國者陳之君臣竟不悟至後主之代災異屢  
起懼而於太皇寺捨身為奴以祈冥助不恤國政耽酒  
色棄禮法不修鄰好以取敗亡

北齊後主武平元年夏震丞相段孝先南門柱京房易傳曰震及貴臣門及屋者不出三年佞臣被誅後歲和士開被戮

唐太宗貞觀十一年四月甲子震乾元殿前槐樹震耀天之威怒以象殺戮槐古者三公所樹也 武后延載元年六月淮南偃師縣李材村有震電入民家地震裂闊丈餘長十五里深不可測所裂處井廁相通或衝冢墓極出平地無損李國姓震電威刑之象地陰類也

證聖元年正月丁酉雷雷者陽聲出非其時臣竊君柄之象 長安四年五月丁亥震雷大風拔木人有震死者 代宗永泰元年二月甲子夜震霆自是無雷至六月甲申乃雷 大歷十年四月甲申雷電暴風拔木飄瓦人有震死者京畿害稼者七縣 德宗建中元年九月乙卯雷 四年四月丙子東都畿汝節度使哥舒曜攻李希烈進軍至潁橋大雨震電人不能言者十三四馬驢多死 貞元十四年五月己酉夏至始電 憲宗

元和十一年冬雷 穆宗長慶二年六月乙丑大風震  
電落太廟鵠尾破御史臺樹 文宗太和八年七月辛  
酉定陵臺大雨震廡下地裂二十有六步占曰士庶分  
離大臣專恣不救大敗 武宗會昌三年五月甲午始  
雷 懿宗咸通四年十二月震雷 僖宗乾符二年十  
二月震雷雨雹 昭宗乾寧四年李茂貞遣將符道昭  
攻成都至廣漢震雷有石隕於帳前

宋太祖建隆三年四月癸巳宿州日無雨雷霆暴作軍

校傅韜震死是夜半風雷起於京師開封縣署役夫劉  
延嗣萬進震死頃之進復蘇言有烟焰自牖入室因駭  
仆徧體焦灼 乾德二年正月辛巳雷聲起京師西南  
東行有電五月戊戌大名府大雨雷震焚橐聚 四年  
七月海州雷震長吏廳土木多圯傷刺史梁彥超 開  
寶七年六月易州雷震死耀武軍士八人 八年八月  
邛州延貴鎮震死民費貴及其四子 太宗太平興國  
二年七月瀛州景城縣霆震死牛商馮乂 端拱二年

八月興化軍民劉政震死有文在胷中曰大不孝九月  
丙午夜半雷聲起京師西北 淳化三年七月泗州大  
風雨震僧伽塔柱 至道元年三月甲戌京師雷未發  
聲召司天監丞趙昭益問之云按占雷不發聲寬政之  
應也七月泗州大風雨雷震僧伽塔及壞鐘樓 真宗  
咸平元年正月戊寅京師西北有雷電十一月瀛州順  
安軍並東北有雷 三年十月黃州西北雷聲如盛夏  
時十一月真定府東南雷 四年十月乙巳京師西南

雷電閏十二月大名府雷 五年九月辛亥京師雷

六年十一月甲午京師暴雷震司天言國家發號布德  
未及黎庶時議改元肆赦詔宰相增廣條目采民病悉

除之 景德三年九月丙寅夕京師大震電 大中祥

符元年正月癸未京師西北雷 五年十二月己巳京

師西北雷電 九年五月殿侍張信奉南海祝版乘驛

至唐州震死 徽宗大觀三年十月戊子大雷電雨

高宗紹興五年十月丁巳雷 六年十月丙午雷 九

年十月丁卯雷 十一年十一月己酉雷 十五年十  
月辛卯雷十二月甲寅雷 十六年溫州大雷電龍翔  
寺震死者六人十九年十月甲寅雷二十一年二  
月辛未南安軍大雷電大庾縣治震死者四人十一月  
辛未夜震雷十二月癸酉雷 二十二年十二月戊寅  
己卯雷 二十六年十二月甲子雷 孝宗乾道二年  
十一月戊辰日南至大震雷癸酉策免相葉顥魏杞七年正月  
丙戌雷自是迄夏無雷 淳熙十二年十一月戊午雷

十二月丁丑雷 十三年正月雷後三十五日有雪

十四年十一月冬雷 十六年七月大雷震太廟齋殿

光宗紹熙二年正月雷雪 三年正月庚戌朔雷

四年十一月己卯日南至辛巳雷 五年十月大雷震

寧宗慶元元年春無雷 開禧三年十月辛未雷

嘉定三年十月雷 五年七月雷雨震太廟鵠吻十月

冬雷 六年閏九月雷電 十年正月朔雷 十一年

九月辛巳明堂禮成肆赦雷電 十四年十六年俱冬

雷

物自鳴

即五行志所謂鼓妖也無形有聲無雲而雷謂之  
鼓妖今所載凡不當鳴而鳴者皆入焉

左傳僖公三十二年十二月己卯晉文公卒庚辰將殯  
於曲沃出絳柩有聲如牛劉向以為近鼓妖也喪凶事  
聲如牛怒象也將有急怒之謀以生兵革之禍時秦穆  
公遣兵襲鄭晉要之崤阨以敗其師晉不惟舊而聽虐

謀結怨強國四被秦寇禍流數世凶惡之效也

考王十三年晉無雲而雷 威烈王三年十一月晉有

火下於北方其聲如鼓

秦二世元年天無雲而雷劉向以為雷當託於雲猶君  
託於臣陰陽之合也二世不恤下下民怨叛是歲陳勝  
起趙高作亂秦遂亡一曰易震為雷為顙不恭也

漢成帝元延元年四月丁酉無雲而有雷聲光耀耀四  
面下至地止 袁帝建平二年四月乙亥朔御史大夫

朱博為丞相少府趙玄為御史大夫臨延登受策有大

聲如鐘鳴

師古曰延入而登殿也漢舊儀云丞相御史大夫初拜皇帝延登親詔也

殿中郎

吏陞者皆聞焉

執兵列於階側

上以問黃門侍郎揚雄

李尋尋對曰洪範所謂鼓妖也師法以為人君不聰為

衆所惑空名得進則有聲無形不知所從生其傳曰歲

月日之中則正卿受之今以四月日加辰已有異是為

中焉正卿謂執政大臣也宜退丞相御史以應天變然

雖不退不出期年其人自蒙其咎

師古曰期年十二月也蒙猶被也期音基

揚雄亦以為鼓妖聽失之象也朱博為人彊毅多權謀  
宜將不宜相恐有凶惡亟疾之怒

師古曰亟急也音居力反

八月博

玄坐為奸謀博自殺玄減死論京房易傳曰令不修本  
下不安金毋故自動若有音 元壽元年九月孝元廟

殿門銅龜蛇鋪首鳴

如淳曰門鋪首作龜蛇之形而鳴呼也門之鋪首所以銜環者也

王莽天鳳三年十月戊辰王路朱鳥門鳴晝夜不絕

崔發等曰虞帝闢四門達四聰門鳴者明當修先聖  
之禮招四方之士也於是令羣臣皆賀所舉四行從

朱鳥門入而對策焉

後漢獻帝建安七八年中長沙醴陵有大山常大鳴如牛响聲積數年後豫章賊攻沒醴陵縣殺掠吏民晉惠帝元康元年三月有聲若牛出許昌城十二月廢愍懷太子幽於許宮明年賈后遣黃門孫憲殺太子擊以藥杵聲聞於外是其應也

蘇峻在歷陽外營將軍鼓自鳴如人弄鼓者峻手自破之曰我鄉土時有此則城空矣俄而作亂夷滅此

聽不聰之罰也

石季龍末洛陽城西北九里石牛在青石趺

甫於反

上

忽鳴聲聞四十里季龍遣人打落兩耳及尾鐵釘釘

上音丁下  
都定反四脚尋而季龍死

孝武太元十五年三月己酉朔東北方有聲如雷按劉向說以為雷當託於雲猶君託於臣無雲而雷此君不恤於下下人將叛之象也及帝崩而天下漸亂孫恩桓

玄交陵京邑

吳興長城夏桀山有石鼓長丈餘面徑三尺所下有盤石為足鳴則聲如金鼓三吳有兵至安帝隆安中大鳴後有孫恩之亂

齊武帝永明十一年七月上不豫徙御延昌殿始登階而殿屋鳴吒上惡之至八月崩

梁武帝天監四年十一月天清朗西南有電光有雷聲二洪範五行傳曰雷霆託於雲猶君託於人也君不恤天下故人怨叛是歲交州刺史李凱反十九年九月

西北隱隱有聲如雷赤氣下至地是歲盜殺東莞瑯琊  
二郡守以朐山引魏軍 中大通六年十二月西南有  
聲如雷其年北梁州刺史蘭欽舉兵反

陳宣帝太建二年十二月西北有聲如雷其年湘州刺  
史華皎舉兵反

北齊文宣天保四年四月西南有聲如雷時帝不恤天  
下興師旅

後周武帝建德六年正月西方有聲如雷未幾吐谷渾

寇邊

隋文帝開皇十四年正月旦廓州連雲山有聲如雷時  
五羌反叛侵邊二十年無雲而雷京房易飛候曰國  
將易君下人不靜小人先命國凶有兵甲後數歲帝崩  
漢王諒舉兵反是年十一月京都大風地大震鼓皆應  
淨利寺鐘三鳴佛殿門鎖自開銅像自出戶外鐘鼓自  
鳴者近鼓妖也揚雄以為人君不聰為衆所惑空名得  
進則鼓妖見時獨孤后干政楊素權傾人主帝聽二人

之讒黜高頤廢太子勇晉王鈞虛名而見立 煙帝大業中滻陽石鼓頻歲鳴其後天下大亂兵戎並起

唐高祖武德二年三月太行山聖人崖有聲占曰有寇至 三年二月丁丑京師西南有聲如崩山近鼓妖說者以為人君不聰為衆所惑則有聲無形不知所從生

武后天授元年九月檢校內史宗秦客拜日無雲而震近鼓妖也 玄宗開元二十八年六月吐蕃圍安戎城斷水路城東山鳴石坼湧泉二 德宗貞元十三年

六月丙寅天晦街鼓不鳴僖宗中和二年十月西北  
方無雲而雷昭宗天復三年十月甲午有大聲出於  
宣武節度使廳事近鼓妖也

後唐莊宗同光三年九月丁未夜偏天陰雲北方有聲  
如雷雉皆雊俗呼曰天狗墜

宋高宗紹興七年五月汴京無雲而雷是歲偽齊亡  
三十年十月庚戌晝漏半無雲而雷癸亥日過中無雲  
而雷孝宗淳熙十四年六月甲申昧爽上將禱雨太

一宮乘輿未駕有大聲發自內及於和寧門人馬辟易  
相踐藉有失巾屨者近鼓妖也 光宗紹熙二年溫州  
瑞安縣感應侯廟鼓自鳴後日邑有巨寇昇鼓去先是  
鼓上有書曰鼓響盜長鼓壞盜敗寇果以旬日就僇與  
晉志隆安石鼓鳴孫恩同占

物自動

即五行志所謂木滲金也志中惟載金石自動今  
所載凡非動物而自動者皆入焉

周威烈王二十三年九鼎震金震木動之也時周室衰微號令不從以亂金氣鼎者宗廟之寶器宗廟將遷故震動也是歲晉三卿韓魏趙分晉地王命以為諸侯其後秦遂滅周而取九鼎九鼎之震木沴金失衆心

漢成帝元延元年正月長安章城門門牴自亡

晉灼曰  
西出南

頭第一門也牴是出籥者師古曰牴所以下閑者也亦以鐵為之非出籥也

京房易傳曰饑

而不損茲謂秦厥災水厥咎牡亡妖辭曰闕動牡飛辟

為亡道臣為非厥咎亂臣謀篡

易妖變傳辭

故谷永對曰章

城門通路寢之路函谷關距山東之險城門關守國之  
固固將去焉故牡飛也 平帝元始元年二月乙未義  
陵寢神衣在柙中哀帝陵也丙申旦衣在外牀上寢令以急  
變聞祠以太牢

王莽地皇元年七月杜陵便殿乘輿虎文衣廢藏在  
室匣中者出自樹立堂上良久乃委地吏卒見者以  
聞莽惡之

魏齊王正始末河南尹李勝治廳事有小材激墮掘受

符石虎頭斷之此木沴金也勝後旬日而敗

晉惠帝元康八年五月郊祿壇石中破為二此木沴金也郊祿壇求子之神位無故自毀太子將危之妖也明年愍懷廢死孝武帝太元十年四月謝安出鎮廣陵始發石頭金鼓無故自破木沴金之異也天戒若曰安徒揚經畧之聲終無其實鉦鼓不用之象也月餘以疾還而薨

梁武帝大同十二年曲阿建陵隧口石騏驛動木沴金

也動者還移之象天戒若曰園陵無主石麟將為人所  
移也後竟國亡  太清元年帝捨身光嚴重雲殿游仙  
化生皆震動三日乃止當時謂之祥瑞識者以為非動  
而動在洪範為妖以比石虎之敗殿壁畫人頸皆縮入  
頭之類又送辟邪二於建陵左雙角者至陵所右獨角  
者將引於車上振躍者三車兩轍俱折因換車未至陵  
二里所又躍者三每一振則車側人莫不聳奮去地三  
四尺車輪陷入土三寸木滲金也劉向曰失衆心令不

行言不從以亂金氣也石為陰臣象也臣將為變之應  
武帝暮年君臣唯講經談玄朝綱紊亂令不行言不從  
之咎也其後致侯景之亂 元帝承聖二年正月己卯

江夏宮南門籥牡飛

北齊武成河清四年殿上石自起兩兩相擊眭孟以為  
石陰類下人象殿上石自起者左右親人離叛之應也  
及周師東伐寵臣尉相願乞扶貴和兄弟之徒皆叛入

周

周武帝建德元年濮陽郡有石像郡官令載向府將刮取金在道自躍投地如此者再乃以大繩縛著車壁又絕繩而下時帝既滅齊又事淮南征伐不息百姓疲敝失衆心之應也

唐武后長壽中東都天宮寺泥像皆流汗霖霖 中宗神龍中東都白馬寺鐵像頭無故自落於殿門外 玄宗天寶五載四月宰臣李適之常列鼎俎具膳羞中夜鼎躍相鬪不解鼎耳及足皆折 穆宗長慶中新都大

道觀泥人生鬚數寸拔之復生

後晉出帝開運元年七月一日夜大雷雨明德門內井亭有石槽槽有龍首其夕漂行數步而龍首斷焉識者云石國姓也而龍首既斷大不吉之象晉祚果終開運宋太祖乾德五年十一月許州開元觀老君像自動時知州宋偓以聞六年正月簡州普通院毗盧佛像自動神宗元豐元年邕州佛像動搖初像嘗動而交人動入寇又動而州大火其後儂智高叛復動於是知州錢

師孟投之江中 高宗紹興二年宣州有鐵佛像坐高丈餘自動迭前迭却若僵而就人者數日既而郡有火勝金火氣盛金失其性而為變怪也 二十年二月

溫州戒福寺有銅佛像頂珠自動光彩激射終日不少停數日火作寺焚與宣州鐵佛同占皆火沴金也 孝

宗淳熙九年春德興縣民家有鏡自飛舞與日光相射

物自壞

即五行志所謂金沴木也

春秋文公十三年太室屋壞近金沴木木動也先是冬  
僖公薨十六月乃作主後六月又吉禘於太廟而致僖  
公左氏說曰登僖於閔上逆祀也又未三年而吉禘前  
後亂賢父聖祖之大禮太室屋壞象魯自是而陵夷將  
墮周公之祀也

漢景帝三年十二月吳二城門自傾大船自覆劉向以  
為近金沴木木動也先是吳王濞以太子死於漢稱疾  
不朝陰與楚王戊謀為逆亂城猶國也其一門名曰楚

門一門曰魚門吳地以船為家以魚為食天戒若曰與楚所謀傾國覆家吳王不寤正月與楚俱起兵身死國亡京房易傳曰上下咸誦厥妖城門壞師古曰詩惑也音布內反

宣帝時大司馬霍禹所居第門自壞時禹內不順外不敬見戒不改卒受滅亡之誅 哀帝時大司馬董賢第門自壞時賢以私愛居大位賞賜無度驕慢不敬大失臣道見戒不改後賢夫妻自殺家徙合浦

後漢桓帝延熹五年太學門無故自壞襄楷以為太學

前疑所居本傳楷書無前疑之言也其門自壞文德將喪教化廢也

是後天下遂至喪亂 桓帝永康元年十月壬戌南宮

平城門內屋自壞金沴木木動也其十二月宮車晏駕

靈帝光和元年南宮平城門內屋武庫屋及外東垣

屋前後頽壞蔡邕對曰平城門正陽之門與宮連郊祀

法駕所由從出門之最尊者也武庫禁兵所藏東垣庫

之外障易傳曰小人在位上下咸悖厥妖城門內崩潛

譚巴曰宮瓦自墮諸侯強陵主此皆小人之顯位亂法

之咎也其後黃巾賊先起東方庫兵大動皇后同父兄  
何進為大將軍同母弟苗為車騎將軍兄弟並貴盛皆  
統兵在京都其後進欲誅廢中官為中常侍張讓段珪  
等所殺兵戰宮中闕下更相誅滅天下兵大起三年

二月公府駐駕廡自壞南北三十餘間 中平二年二

月癸亥廣陽城門外上屋自壞 獻帝初平二年三月

長安宣平城門外屋無故自壞至三年夏司徒王允使

中郎將呂布殺太師董卓夷三族袁山松曰李傕等攻破長安城害允等

興平元年十月長安市門無故自壞至二年春李傕  
郭汜鬪長安中催迫劫天子移置郿塢盡燒宮室殿宇  
城門官府民舍放兵寇抄公卿以下

魏文帝黃初七年正月幸許昌城南門無故自崩帝心  
惡之遂不入還洛陽此金沴木木之動也五月宮車晏  
駕京房易傳曰上下咸悖厥妖城門壞

晉武帝太康五年五月宣帝廟地陷梁折八年正月  
太廟殿又陷改作廟基及泉其年九月遂更營新廟遠

致名材雜以銅柱至十年四月乃成十一月庚寅梁又折天戒若曰地陷者分離之象梁折木不曲直也明年帝崩王室遂亂 惠帝太安二年成都王穎使陸機率衆向京師擊長沙王乂軍始引而牙竿折俄而戰敗機誅穎奔死 元帝太興二年六月吳郡米廩無故自壞天戒若曰夫米廩貨糴之屋無故自壞此五穀踴貴所以無糴賣也是歲遂大饑死者千人焉 明帝太寧元年周旋自歸王敦既立其宅宇所起五間六梁一時躍

出墜地餘桁猶亘柱頭此金沴木也明年五月錢鳳謀亂遂族滅筵而湖熟尋亦為墟矣安帝元興元年五月丙子會稽王世子元顯將討桓玄建牙竿於揚州南門其東者難立良久乃正近沴妖也而元顯尋為玄所擒三年五月樂賢堂壞時帝囁眡無樂賢之心故此堂見沴義熙九年五月國子聖堂壞天戒若曰聖堂禮樂之本無故壞業祚將墜之象未及十年而禪位焉陳文帝天嘉六年秋七月儀賢堂無故自壓近金沴木

也時帝盛修宮室百姓失業故木失其性後主禎明

元年六月宮內水殿若有刀鋸斫伐之聲其殿因無故

而倒七月朱雀航又無故自沉時後主盛修園囿不虔

宗廟水殿者遊宴之所朱雀航者國門之大路無故自

壞天戒若曰宮室毀津路絕後竟為隋所滅宗廟為墟

後齊孝昭帝將誅楊愔乘車向省入東門轡竿無故自

折帝甚惡之歲餘而崩武成河清三年長廣郡廳事

梁忽剝若人狀太守惡而削去之明日復然長廣帝本

封也木為變不祥之兆其年帝崩後主武平七年秋  
穆后將入晉陽向北宮辭胡太后至宮內門所乘七寶  
車無故陷入於地牛沒四足是歲齊滅后被虜於長安  
後周武帝建德六年青城門無故自崩青者東方色春  
宮之象也時皇太子無威儀禮節青城門無故自崩者  
皇太子不勝任之應帝不悟明年太子嗣立果為無道  
周室危亡實自此始

隋煬帝大業中齊王暕於東都起第新構寢堂其狀無

故而折時上無太子天下皆以暕次當立公卿屬望暕  
遂驕恣呼術者令相又為厭勝之事堂狀無故自折木  
失其性奸謀之應也天見變以戒之暕不悟後竟得罪  
於帝

唐高祖武德元年八月戊戌突厥始畢可汗衡帳無故  
自壞 中宗即位金雞竿折雞竿所以肆赦始登大號  
而雞竿折不祥 神龍中有羣狐入御史大夫李承嘉  
第其堂無故壞又秉筆而管直裂易之又裂 玄宗開

元五年正月癸卯太廟四室壞 天寶十四載哥舒翰  
帥師守潼關前軍啓行牙門旗至坊門觸落槍刃衆以  
為不祥 代宗永泰二年三月辛酉中書敕庫壞 德  
宗貞元四年正月庚戌朔德宗御含元殿受朝賀質明  
殿階及欄檻三十餘間自壞衛士死者十餘人含元路  
寢大朝會之所御也正月朔一歲之元王者之事天所  
以儆者重矣 文宗太和九年鄭注為鳳翔節度使將  
之鎮出開遠門旗竿折僖宗光啓初揚州府署門屋

自壞故隋之行臺門也制度甚宏麗云

宋高宗紹興三年八月辛亥尚書省後樓屋無故自壞

文獻通考卷三百七

欽定四庫全書

文獻通考卷九千六百三十

史部

文獻通考卷三百八

鄱陽馬端臨貴與著

物異考十四

人異

按傳曰皇之不極厥罰常陰時則有下人伐上之  
病昌邑王時霍光將議廢立而夏侯勝援此以諫  
王出遊光與張安世疑謀已泄而驚異其說然則

所謂下人伐上之癘乃犯上反叛之謂然歷代史志只謂之人癘而所載者則形體之妖異或舉動言語之狂惑或化為異物或已死復生殊不及叛逆之事蓋人癘者妖也叛逆者其應也又下而犯上臣而背君其妖孰甚焉故總謂之人癘云

春秋文公十一年敗狄于鹹

師古曰  
魯地也  
鹹

穀梁公羊傳曰

長狄

師古曰  
防風之後  
漆姓也  
國號

兄弟三人一者之

魯

師古曰  
僑如也  
宋伐  
魯為叔孫得臣所獲

一者之齊

師古曰  
榮如也  
齊襄  
公二年伐齊為王者

成父所獲

一者之晉

師古曰楚如也宣十五年晉滅潞國而獲之

皆殺之身橫九

晦

師古曰晦古歎字

斷其首而載之肩見於軾

師古曰軾車前橫木

何以

書記異也劉向以為是時周室衰微

三國為大可責者

也天戒若曰不行禮義大為夷狄之行將致危亡其後

三國皆有篡弑之禍

師古曰謂魯文公薨襄仲弑惡及視而立宣公齊連稱管至父弑襄

公而立無知晉樂書中行偃弑厲公而立悼公

近下人伐上之痾也劉歆以為

人變屬黃祥一曰屬羸蟲之孽

一曰天地之性人為貴

凡人為變皆屬皇極下人伐上之痾云京房易傳曰君

暴亂疾有道厥妖長狄入國又曰豐其屋下獨苦

師古曰豐

其屋易豐卦上六爻辭豐大也

長狄生世主虜

史記魏襄王十三年魏有女子化為丈夫京房易傳曰

女子化為丈夫茲謂陰昌賤人為王丈夫化為女子茲

謂陰勝厥咎亡一曰男化為女宮刑濫也

如淳曰宮刑之行大濫也

女化男婦政行也

報王三十一年齊有人當闕而哭者求之不得去則聞

其聲時燕昭王伐齊齊湣王出奔為楚將淖齒所弑

史記秦始皇帝二十六年有大人長五丈足履六尺皆  
夷狄服凡十二人見於臨洮師古曰隴西之縣也音吐高反天戒若曰

勿大為夷狄之行將受其禍是歲始皇初并六國反喜

以為瑞銷天下兵器作金人十二以象之遂自贊聖燔

詩書阨儒士奢淫暴虐務欲廣地南戍五嶺北築長城

以備胡越師古曰五嶺解在張耳陳餘傳整山填谷西起臨洮東至遼

東徑數千里故大人見於臨洮明禍亂之日起後十四年

而秦亡已自戊卒陳勝發

秦始皇三十六年鄭客從闕東來至華陰望見素車白馬從華山上下知其非人道住止而待之遂至持璧與客曰為我遺渴池君長安西北有渴池君則池神也江神告之因言今年祖龍死象謂始皇帝也忽不見客奉璧始皇使御史視之即二十八年過江所湛璧也默然良久曰山鬼不過知一歲事也

漢高祖為亭長送徒驪山被酒夜經澤中有大蛇當徑乃拔劍斬蛇後人來至蛇所有一老嫗夜哭人問之曰

吾子白帝子也化為蛇當道今者赤帝子斬之故哭人  
以嫗為不誠欲苦之嫗因忽不見後人告高祖高祖心  
獨喜自負諸從者日益畏之 景帝二年九月膠東下  
密人年七十餘生角角有毛時膠東膠西濟南齊四王有  
舉兵反謀謀由吳王濞起連楚趙凡七國下密縣居四齊  
之中角兵象上鄉者也老人吳王象也年七十七國象  
也天戒若曰人不當生角猶諸侯不當舉兵以鄉京師  
也禍從老人生七國俱敗云京房易傳曰冢宰專政厥

妖人生角 武帝征和元年上居建章宮見一男子帶  
劍入中龍華門疑其異人命收之男子捐劍走逐之弗  
獲上怒斬門候冬十一月發三輔騎士大搜上林閑長  
安城門索十一日乃解巫蠱始起 哀帝建平中豫章  
有男子化為女子嫁為人婦生一子長安陳鳳言此陽  
變為陰將已繼嗣自相生之象一曰嫁為人婦生一子  
者將復一世乃絕 哀帝建平四年四月山陽方與女  
子田無晳生子師古曰方與者山陽之縣也女先未生  
子姓田名無晳方與音房豫

二月兒嘯腹中及生不舉葬之陌上三日人過聞嘯聲  
母掘收養 平帝元始元年二月朔方廣牧女子趙春  
病死師古曰廣牧朔方之縣也姓趙名春歛棺積六日師古曰歛音力贍反棺音工喚反

出在棺外自言見夫死父曰年二十七不當死太守譚  
以聞京房易傳曰幹父之蠱有子考无咎韋昭曰蠱事也子能正父

之事是為有子故考不為咎累師古曰易蠱卦初六爻辭也子三年不改父道思慕

不皇亦重見先人之非師古曰言久有不善之事當速改之若唯思慕而已無所變易是重顯先人之非也一曰三年之內但思慕而已不暇見父之非故不改也重音直用反 不則為私

穀妖人死復生一曰至陰為陽下人為上六月長安女

予有生兒兩頭異頸面相鄉四臂共胸俱前鄉

師古曰

嚮尻上有目長二寸所京房易傳曰睽孤見豕

負塗  
古師

曰易睽卦上九爻辭也睽孤乖  
刺之意也塗泥也睽音苦攜反  
厥妖人生兩頭下相攘

善妖亦同人若六畜首目在下茲謂正上正將變更月

妖之作以譴失正各象其類二首下不一也足多所任

邪也足少下不勝任或不任下也凡下體生於上不敵

也上體生於下蝶瀆也生非其類淫亂也人生而大上

速成也生而能言好虛也羣妖推此類不改乃成凶也

王莽始建國二年甄豐子尋坐偽作符命誅黨與死者數百人尋手理有天子字莽解其臂入視之曰此

一大子也或一六子也六者戮也明尋父子當戮死

也是歲池陽縣有小人景長尺餘或乘車馬或步

行操持萬物大小多相稱車馬及物皆稱人之形

三日止天

鳳四年連率韓博上言有奇士長丈大十圍來至臣府曰欲奮擊胡虜謂巨母霸出於蓬萊東南五城西

北昭如海瀨昭如海 軺車不能載三馬不能勝即日  
以大車四馬建虎旗載霸詣闕霸卧則枕鼓以鐵著  
食乞迎之於道京師門戶不容者開高大之以視百  
蠻

後漢靈帝建寧三年春河內婦食夫河南夫食婦臣昭  
曰以夫之尊在河之陽而陰承體卑吞食尊陽將非君道昏  
弱無居剛之德遂為陰細之人所能消毀乎夫為家之  
主而乃自食正內之人時宋皇后將立而靈帝一聽閭  
官無所厝心宋后終廢天戒若曰徒隨嬖豎之意夫歟  
其妻二年雒陽上西門外女子生兒兩頭異肩共胃

俱前向以為不祥墮地棄之自此之後朝廷霧亂政在私門上下無別二頭之象後董卓弑太后被以不孝之名放廢天子後復害之漢元以來禍莫踰此四年魏郡男子張博送鐵盧詣太官博士上書室殿山居屋後宮禁落屋謹呼上收縛考問辭忽不自覺知臣昭曰魏人之徵至後宮而謹呼終亦禍發母后中平元年六月壬申雒陽男子劉倉居上西門外妻生男兩頭共身靈帝時江夏黃氏之母浴而化為龜入於深淵其後時出見初浴簪一銀

釵及見猶在其首

臣昭曰黃者體化為龜龜者漢之色也入於深淵水寶元也

制火夫君德尊陽利見九五飛在於天乃備光

盛俯等龜龜有愧潛躍首從戴釵卑弱未盡

獻帝

初平中長沙有人姓桓氏死棺斂月餘其母聞棺中聲

發之遂生占曰至陰為陽下人為上其後曹公由庶士

起建安四年二月武陵充縣女子李娥年六十餘物

故其家以杉木槿斂墓於城外數里上已十四日有行

者聞冢中有聲便語其家其家徃視聞聲便發出遂活

七年越嵩有男子化為女子時周羣上言哀帝時亦

有此異將有易代之事至二十五年獻帝封於山陽  
建安中女子生男兩頭共身

魏文帝黃初初清河宋士宗母化為鱉入水 明帝太  
和三年曹休部曲丘奚農女死復生時有開周世家得  
殉葬女子數日而有氣數月而能言郭太后愛養之又  
太原人發冢破棺棺中有一生婦人問其本事不知也  
視其墓木可三十歲按京房易傳曰至陰為陽下人為  
上宣帝起之象也漢平帝獻帝並有此異占以為王莽

曹操之證 青龍元年并州刺史畢軌送漢故度遼將軍范明友鮮卑奴年三百五十歲而言語飲食如常人奴云霍顯光後小妻明友妻光前妻女時京邑有一人失其姓名食啖兼十許人遂肥不能動其父曾作遠方長吏官徒送彼縣令故義傳供食之一二年中一鄉輒為之儉 三年中壽春農民妻自言為天神所下命為登女當營衛帝室蠲邪納福飲人以水及以洗創或多愈者於是立館後宮下詔稱揚甚見優寵及景初二年

帝疾飲水無驗以致大漸於是斬焉 元帝咸寧二年

八月襄武縣言有大人見長三丈餘跡長三尺二寸髮  
白著黃巾單衣拄杖呼王始語曰今當太平晉尋伐魏  
吳孫休時烏程人有得困病及瘥能以嚮言者言於此  
而聞於彼自其所聽之不覺其聲之大也自遠聽之如  
人對言不覺聲之自遠來也聲之所往隨其所向遠者  
所過十數里其鄰人有責息於外歷年不還乃假之使  
為責讓懼以禍福負物者以為鬼神即顛倒界之其人

亦自不知所以然也

按此事晉史置之言不從條下然此妖異也故令  
移植之人病門云

孫休永安四年安吳氏陳焦死七日復生穿冢出于寶  
曰此與漢宣帝同事烏程侯皓承廢故之家得位之祥  
也 孫皓寶鼎元年丹陽宣篤母時年八十因浴化為  
龜兄弟閉戶衛之掘堂上作一大坎實水其中龜入坎  
遊戲一二日恒延頸外望伺戶小開便輪轉自躍入於

遠潭遂不復還此與漢靈帝時黃氏母事同吳王之象  
也

晉武帝泰始五年元城人年七十生角殆趙王倫篡亂  
之象也 咸寧二年十二月琅邪人顏畿病死棺斂已  
久家人咸夢畿謂已曰我當復生可急開棺遂出之漸  
能飲食屈伸視瞻不能行語二年復死京房易傳曰至  
陰為陽下人為上厥妖人死復生其後劉石僭逆遂亡  
晉室下為上之應也 惠帝元康中安豐有女子周世

寧八歲漸化為男子至十七八而氣性成京房易傳曰女子化為丈夫茲謂陰昌賤人為王此亦劉石覆蕩天下之妖也元康中梁國女子許嫁已受禮聘尋而其夫成長安經年不歸女家更以適人女不樂行其父母逼強不得而去尋病亡後其夫還問其女所在其家具說之其夫逕至女墓不勝哀情便發冢開棺女遂活因與歸家後婿聞知詣官爭之所在不能決祕書郎王導議曰此是非常事不得以常理斷之宜還前夫朝廷從

其議 惠帝世杜錫家葬而婢誤不得出後十年開冢

祔葬而婢尚生始如瞑有頃漸覺問之自謂再宿爾初

婢之埋年十五六及開冢更生猶十五六也嫁之有子

光熙元年會稽謝真生子頭大而有髮兩疎之石反

向上有男女兩體生便作丈夫聲經一日死此皇之不  
極下人伐上之病於是諸王有僭亂之象也 惠帝之

世京洛有人兼男女體亦能兩用人道而性尤淫此亂  
氣所生自咸寧太康之後男寵大興甚於女色士大夫

莫不尚之天下相倣倣或至夫婦離絕多生怨曠故男女氣亂而妖形之作也 懷帝永嘉元年吳郡吳縣萬祥婢生子鳥頭兩足馬蹄一手無毛尾黃色大如枕此亦人妖亂之象也 五年五月枹罕令嚴根妓產一龍一女一鷺京房易傳曰人生他物非人所見者皆為天下大兵是時帝承惠皇之後四海沸騰尋而隔於平陽為逆胡所害此其徵也 懷帝建興四年新蔡縣吏任僑妻產二女腹與心相合自胷以上臍以下各分此蓋

天下未一之妖也時內史呂會上言按瑞應圖異根同體謂之連理異故同穎謂之嘉禾草木之異猶以為瑞令二人同心易稱二人同心其利斷金蓋四海同心之瑞也時皆哂之俄而四海分崩帝亦淪沒元帝太興初有女子其陰在腹當臍下自中國來至江東其性淫而不產又有女子陰在首渡在揚州性亦淫京房易傳曰人生子陰在首天下大亂在腹天下有事在背天下無後於時王敦據上流將欲為亂是其徵

三年十二

月尚書騶謝平妻生女墮地漫漫反  
匹備有聲湏臾便死

鼻目皆在項上面處如項口有齒都連為一胷如鼈手

足爪如鳥爪皆下勾此亦人生他物非人所見者後二

年有石頭之敗 明帝太寧二年七月丹陽江寧侯紀

妻死經三日復生 成帝咸康五年四月下邳民王和

僑居暨

居未

反 陽息女可年二十自云上天來還得徵瑞

印綬當母天下晉陵太守以為妖收付獄至十一月有

人持柘

之夜

杖絳衣詣止車門口列為聖人使求見天

子門候受辭辭稱姓呂名賜其言王和女可右足下有  
七星星皆有毛長七寸天今命可為天下母奏聞即伏  
誅并下晉陵誅可康帝建元二年十月衛將軍營督  
過望所領兵陳瀆女臺有文在其足曰天下之母炎之  
愈明京都誼譁有司收繫以聞俄自建康縣獄亡去明  
年帝崩獻后臨朝此其祥也孝武帝寧康初南郡州  
陵女唐氏漸化為丈夫安帝義熙七年無錫人趙末  
年八歲一旦暴長八尺髡鬚上即移反下相俞反蔚尉音然三日而

死 義熙中東陽人莫氏生女不養理之數日於土中  
啼取養遂活 義熙末豫章吳平人有二陽道重累生  
恭帝元熙元年建安人陽道無頭正平本下作女人  
形體

劉聰子約死一指猶暖遂不殯殮及蘇言見元海於  
不周山經五日而遂復從至崑崙山三日而復返於  
不周見諸王公卿將相死者悉在宮室甚壯麗號曰  
蒙珠離國元海謂約曰東北有遮須夷國無主久待

汝父為之汝父後三年當來來後國中大亂相殺害  
居家死亡略盡但可永明輩十數人在耳汝宜還後  
年當來見汝不久約拜辭而回道過一國曰猗尼渠  
餘國引約入宮與約皮囊一枚曰為吾遺漢皇帝約  
辭而歸謂約曰劉郎後年來必見過當以小女妻之  
約歸置皮囊於机上俄而蘇使左右机上取皮囊開  
視之有一方白玉題文曰猗尼渠餘國天王敬信遮  
須夷國天王歲在攝提當相見也馳使呈聰聰曰若

審如此吾不懼死也及聰死與此玉并葬焉 荷健時新平有長人見語百姓張靖曰苻氏應天受命令當太平外面者歸中而安泰問姓名弗答俄而不見新平令以聞健以為妖下靖獄會大雨霖河渭溢浦津監寇登得一履於河長七尺三寸人跡稱之指長尺餘文深一寸健歎曰覆載之中何所不有張靖所見定不虛也乃赦之

宋明帝泰豫元年正月丁巳巨人跡見西池冰上

梁武帝時海中浮鵠山去餘姚岸可千餘里上有女人  
年三百歲有女官道士四五百人年並出百但在山學  
道遣使獻紅席帝方捨身時其使適至云此草常有紅  
鳥居下故以為名觀其圖狀則鸞鳥也時又有男子不  
知何許人於大衆中自割身以飼饑鳥血流徧體而顏  
色不變又沙門智泉鐵鉤挂體以燃千燈一日一夜端  
坐不動太清元年丹陽有莫氏妻生男眼在頂上大  
如兩歲兒墮地而言曰兒是旱疫鬼不得住母曰汝當

令我得過疫鬼曰有上官何得自由母可急作絳帽故當無憂母不暇作帽以絳繫髮自是旱疫者二年揚徐充豫尤甚莫氏鄉鄰多以絳免他土疫之無驗 簡文大寶二年京口人於藏兒年五歲登城西南角大樓打鼓作長掘鼓兵象也時侯景亂江南 元帝承聖元年十二月天門山獲野人出山三日而死

陳武帝永定三年有人長三丈見羅浮山通身潔白衣服楚麗京房易傳曰長人見丘後二歲帝崩 後主為

太子時有婦人突入東宮而大言曰畢國主後主立而祚終之應也至德三年八月建康人家婢死埋之九日而更生有牧牛人聞而出之禎明二年有神自稱老子游於都下與人對語而不見形言吉凶多驗得酒醞齧之經三四年乃去有船下忽聞人言曰明年亂視之得死嬰兒長三尺而無頭明年陳亡

後魏太武大延元年有鄙婦人持方寸玉印詣潞縣侯孫家既而已去莫知所在印有三字為龍鳥之形要妙

奇巧不類人跡文曰旱瘦平

後齊文宣天保中臨漳有婦人產子二頭其體是後政  
由奸佞上下無別兩頭之應也 武成河清四年有神  
見於後園萬壽堂前山穴中其體壯大不辨其面兩齒  
絕白長出於唇帝直宿嬪御已下七百人咸見焉帝又  
夢之 後主武平五年大旱晉陽得死魃長二尺面頂  
各二目帝聞之使刻木為其形以獻

後周武帝保定三年有人產子男陰在背上如尾兩足

指如獸爪陰不當生於背而生者陰陽反覆君臣顛倒之象也人足不當有爪而有者將致攫人之變也時晉公護專政征伐自己陰懷篡逆帝誅之武帝時有強練者佯狂持一瓢至晉蕩公護門而擊破之曰身尚可予苦矣時護專政因朝太后帝擊殺之發兵捕其諸子皆備楚毒而死強練又行乞於市人或遺之粟麥輒以無底袋受之因大笑曰盛空未幾周滅高祖移都長安城為墟矣

隋高祖開皇六年霍州有老翁化為猛獸 七年相州  
有桑門變為蛇尾繞樹而自抽長二丈許 仁壽四年  
有人長數丈見於應門其跡長四尺五寸其年帝崩  
煬帝大業元年鴈門人房回安母年百歲額上生角長  
二寸洪範五行傳曰婦人陰象也角兵象也下反上之  
應是後天下果大亂陰戎圍帝於鴈門 四年鴈門宋  
谷村有婦人生一肉卵大如斗埋之後數日所埋處雲  
霧盡合從地雷震而上視之洞穴失卵所在 六年趙

郡李來王家有婢產一物大如卵 七年正月朔旦有  
盜衣白練裙襦手持香花自稱彌勒佛出世入建國門  
奪衛士仗將為亂齊王陳遇而斬之後三年楊玄感作  
亂引兵圍洛陽戰敗乃伏誅 八年有澄公者若狂人  
於東都大叫唱賊帝聞而惡之明年玄感作亂舉兵  
圍洛陽至十二年澄公又大叫賊李密逼東都孟讓燒  
豐都市而去 九年帝在高陽唐縣人宋子賢善為幻  
術每夜樓上有光明能變作佛形自稱彌勒出世又懸

大鏡於堂上紙素上畫為蛇為獸及人形有人來禮謁者轉側其鏡遣觀來生形像或映見紙上蛇形子賢輒告云此罪業也當更禮念又令禮謁乃轉人形京之遠近惑信日數百千人遂潛謀作亂將為無遮佛會因舉兵欲襲擊乘輿事泄鷹揚郎將以兵捕之夜至其所遼其所居但見火坑兵不敢進郎將曰此地素無坑止妖妄耳及進無復火矣遂擒斬之并坐其黨與千餘家其後復有桑門向海明於扶風自稱彌勒佛出世潛謀逆

亂人有歸心者輒獲吉夢由是人皆惑之三輔之士翕然稱為大聖因舉兵反衆至數萬官軍擊破之京房易飛候曰妖言動衆者茲謂不信路無人行不出三年起兵自是天下大亂路無人行

唐高祖武德四年太原尼志覺死十日而蘇 太宗貞觀十九年衛州人劉道安頭生肉角隱見不常因以惑衆伏誅角兵象肉不可以觸者 高宗永徽六年淄州高苑民吳威妻嘉州民辛道護妻皆一產四男凡物反

常則為妖亦陰氣盛則母道壯也 顯慶三年普州有人化為虎虎猛噬而不仁 儀鳳三年四月涇州獻二小兒連心異體初鶉觚縣衛士胡萬年妻吳生一男一女其胸相連餘各異體乃析之則皆死又產復然俱男女遂育之至是四歲以獻於朝 永隆元年長安獲女也長尺有二寸其狀怪異詩曰旱魃為虐如惔如焚是歲秋不雨至於明年正月 二年九月萬年縣女子劉疑靜白衣從者數人升太史令廳問比有何災異令

執之以聞是夜彗星見太史司天文歷候王者所以奉  
若天道恭授民時者非女子所當問 武后載初中涪  
州民范端化為虎 神功元年二月庚子有人走入端  
門又入則天門至通天宮閣及仗衛不之覺時來俊臣  
婢產肉塊如二升器剖之有赤蟲須臾化為蜂蟄人而  
去 久視二年正月成州有大人跡見長安中郴州左  
史因病化為虎欲食其嫂擒之乃人也雖未全化而虎  
毛生矣 肇宗太極元年狂人段萬謙潛入承天門登

太極殿升御牀自稱天子且言我李安國也人相我年  
三十二當為天子 玄宗開元二十三年四月冀州獻  
長人李家寵八尺有五寸 代宗大歷十年二月昭應  
婦人張產一男二女 德宗貞元八年正月丁亥許州  
人李狗兒持杖上含元殿擊欄檻伏誅 十年四月恒  
州有巨人跡見 十五年正月戊申狂人劉忠詣銀臺  
稱白起令上表天下有火災 十七年十一月翰林侍  
詔戴少平死十有六日而蘇是歲宣州南陵縣丞李嶷

死已殯三十日而蘇 憲宗元和二年商州洪崖治役  
夫將化為虎衆以水沃之不果化 穆宗長慶四年三  
月民徐忠信潛入浴堂門 敬宗寶歷二年十二月延  
州人賀文妻一產四男 文宗太和二年十月狂人劉  
德廣入含元殿 懿宗咸通七年渭州有人生角寸許  
占曰天下有兵 十三年四月太原晉陽民家有嬰兒  
兩頭異頸四手聯足此天下不一之妖是歲民皇甫及  
年十四暴長七尺餘長噭大嚼三倍如初歲餘死 僖

宗乾符六年秋蜀郡婦人尹生子首如豕目在眶下占曰君失道 光啓元年隰州溫泉民家有死者既葬且半月行人聞聲呼地下其家發之則復生歲餘乃死

二年春鳳翔郿縣女子未覲化為丈夫旬日而死京房易傳曰茲謂陰昌賊人為王 昭宗大順元年六月資

州兵王全義妻如孕覺物漸下入股至足大拇指痛甚折而生珠如彈丸漸長大如杯 天祐二年五月潁州汝

陰民彭文妻一產三男

蜀王建元年巨人見青城山

南漢劉鋹時南海民妻生子兩首四臂

宋自太祖建隆元年至真宗天禧四年郡縣上言民妻  
產三男者凡一百九產四男者凡三產一男三女者二  
產二男一女者一 太祖建隆三年齊州晉州大旱民  
家多生駭 太宗太平興國九年揚州揚子縣民妻生  
男毛被體半寸餘面長項高聳肩眉毫麯密近髮際有  
毛兩道軟長眼微紫唇紅厚耳鼻大類胡僧至三歲盡

圖以獻 淳化元年八月汾州悉達院僧智嚴頭生角  
可長三寸 真宗天禧四年七月衡州耒陽縣民張中  
妻產三男其一額有白痣方寸餘上生白髮 仁宗天  
聖至英宗治平婦人生四男者二生三男者四十四生  
二男一女者一說者曰天下安寧人民蕃息之驗也  
神宗熙寧元年距元豐七年郡邑民家生三男者八十  
四而四男者一二男一女者一 元豐八年至哲宗元  
符二年生三男者十八而四男者二三男一女者一

元符三年至欽宗靖康生三男者十九四男者一  
徽宗宣和六年都城有賣青果男子孕而誕子尊母不能  
收易七人始免而逃去又有酒肆號豐樂樓酒保朱氏  
子之妻可四十餘楚州人忽生鬚長僅六七寸疏秀而  
美宛然一男子特詔度為女道士 高宗紹興三年建  
康府桐林灣人產兒肉角有齒角兵象肉不可以觸者  
是歲人多產鱗毛皆人瘤也 二十年八月洋州真符  
縣民家一產三男 孝宗隆興元年建康民流寓行都

產子二首具羽毛之形 乾道五年衡湘間有人化為虎者與唐志顯慶三年人病同占餘杭縣民婦產子青而毛二肉角又有二家婦產子毛角亦如之皆連體兩面相鄉鄉與同三家纔相去一二里病氣同所鍾也又潮州城西婦孕過期產兒如指大五體皆具者百餘蠕蠕能動人病之異也 淳熙十年鄱陽南鄉民產子兩肘各有二臂長十五歲每鬪則六臂並運 十三年行都有人死十四日復生十一月辛未鄧家巷民婦產肉塊

三其一直目而橫口 十四年六月臨安府浦頭民產  
子生而能言四日暴長四尺 光宗紹熙元年平江府  
崑山縣石工採石而山摧工壓焉三年六月他工採石  
鄰山聞其聲呼相應答如平生報其家鑿石出之見其  
妻喜曰久閉乍風肌如裂俄頃聲微噤不語化為石人  
貌如生 寧宗慶元元年饒州樂平民產子人體有尾  
永州民產兒首有角腋有肉翅 二年七月隆興府進  
賢縣民產子亦如之而面有三目 嘉定元年四月鎮

江後軍妻生子一身二首四臂晉志謂中原分裂應此  
人病也後數年金人失中原

文獻通考卷三百八

總校官庶吉士臣張能照  
校對官修撰臣張書勲  
謄錄監生臣徐大豐

財團法人佛陀教育基金會

釋淨空 敬贈